

M306: Die Erlösung (B1)

0,148 sie huop ire stimme an unde sanc
0,149 die winde hatten iren dôz
0,150 jenez wazzer her diz hine vlôz
0,151 unde vuntên doch ire ûzsprinc
0,152 sus wâren aller hande dinc
0,153 geschaffen wole nâch wunsche gar
0,154 des nam ire schepfær guote war
0,155 er sprach nâch gotelîcher ê
0,156 “wir sollen dannoch schaffen mêr
0,157 einen man gar wirdiclich
0,158 der sal sîn uns selben gelîch
0,159 er sal unser bilede hân
0,160 ime sol ouch wesen undertân
0,161 swaz nû hier geschaffen ist”
0,162 er nam dâr nâch in kurzer vrist
0,163 ein gar lützel erden
0,164 dannen ûz sô hiez er werden
0,165 einen man gar lobesam
0,166 mit namen hiez er in Adâm
0,167 er sazte in in daz paradîs
0,168 daz er wære in alle wîs
0,169 aller dinge ein krône
0,170 daz sie ime alle schône
0,171 undertânic sulten sîn
0,172 diz sach unser trehtîn
0,173 und dûhte in allez sament guot
0,174 nû was sîn gotelîcher muot
0,175 der man wære übele eine
0,176 er nam ûze sîneme gebeine
0,177 ein rippe ûze sînen brusten
0,178 er schuof ime wole nâch gelüsten
0,179 einen vrouwelîchen lîp
0,180 daz sie wære sîn êlich wîp
0,181 daz sie wâren beide alein
0,182 zwêne korpere an in zwein
0,183 doch zwei an eineme lîbe
0,184 daz ganze triuwe belibe
0,185 zwein gemecheden iemer mêr

0,186 dâ gap in got alsolich ê
0,187 nû was der wûnnen garte
0,188 gepflanzet alsô zarte
0,189 von aller hande zûhte
0,190 von boumen . von der vrûhte
0,191 daz mennische nützen sulte
0,192 von welicheme daz iz wulte
0,193 âne einer leie dâ hatte got
0,194 ûf gesetzet sîn gebot
0,195 swer sich underwûnte
0,196 der soliche hôchvart vûnte
0,197 oder sich vergæzze
0,198 daz er daz obez æzze
0,199 der stürbe endelîche tût
0,200 unde muoste lîden iemer nôt
0,201 swer ouch daz behielte
0,202 daz er iemer wîelte
0,203 aller créatiure
0,204 dâr nâch hette er die stiure
0,205 swanne ergiengen sîne tage
0,206 hier ûf ertrîche âne klage
0,207 daz er danne daz rîche
0,208 besitze wirdicîche
0,209 mit aller himelischen schar
0,210 der dinge nam der tiuvel war
0,211 der ungetriuwe slange
0,212 der dâ vore unlange
0,213 von dannen was verstôzen
0,214 mit sînen valgenôzen
0,215 deme was sælicheit gegeben
0,216 vröuwede unde êwicîchez leben
0,217 in deme himeltrône
0,218 saz er mit wirde schône
0,219 got hatte grôze schoenheit
0,220 an den engel hêr geleit
0,221 er was der engel hêrste
0,222 an wirdicheite der êrste
0,223 der schoeneste was er ouch erkant
0,224 des was er Luzifer genant
0,225 als ein lichttragære
0,226 sint er der schoeneste wære
0,227 sîn schoenede gap ime übermuot
0,228 als iz noch den liuten tuot
0,229 gein sîneme schepfær satzte er sich
0,230 er seite er sulte ime wesen gelîch
0,231 rehte als hêrr Esayas
0,232 hier vore in sîner schrifte las
0,233 her jach “mac ich den selben grât

0,234 besitzen den mîn schepfær hât
0,235 gesitzen want ich harte wole
0,236 ime an schoenheit gelîchen sol”
0,237 die üppicliche hôchvart
0,238 die schuof daz er verstôzen wart
0,239 der wirdicheit die er besaz
0,240 dâ vone er êwiclîchen haz
0,241 noch hiute zuo den liuten hât
0,242 des vant der boese disen rât
0,243 und den ungetriuwen list
0,244 er sprach “sint diz alsô danne ist
0,245 sint der mennische disen lôn
0,246 besitzen sol und disen trôn
0,247 dâ vone ich bin verjaget
0,248 und ime ist doch gesaget
0,249 swer sich des vermæze
0,250 der daz obez æze
0,251 der stürbe endelîche tôt
0,252 unde müeze haben iemer nôt”
0,253 sô sulte er daz vile wole bewarn
0,254 daz kein mennische torste varn
0,255 hin wider an daz rîche
0,256 dâ vone er schamelîche
0,257 dâ vore vertriben wære
0,258 iz wære im iemer swære
0,259 sulte des himeltrônes
0,260 des wirdiclîchen lônnes
0,261 dâ vone er was verschalten
0,262 iemer ieman walten
0,263 unde hette es êwiclîche sêr
0,264 der boesen vunde vant er mêr
0,265 her dâhte in sînen sinnen
0,266 “wie maht dû nû beginnen
0,267 der rede daz sie vüre sich gê
0,268 dû sultes lîhte komen êr
0,269 zuo Even durch ire lîhticheit
0,270 sie wær dir vilelîhte êr gereit
0,271 danne Adâm der ein man ist”
0,272 diz was ein ungetriuwer list
0,273 hine vuor er alzuohant
0,274 dâ er vrouwen Even vant
0,275 er sprach “ei Eve hoere
0,276 mich dunket ir sît tôre
0,277 daz ir diz obez lâzet stân
0,278 dâ vone ir wîsheit müget hân
0,279 aller hôhen dinge”
0,1038 –[...] der goteheite widerschîn
0,1039 nâch hôher wîsheit ûz erwelt

0,1040 die nieman mizzet joch gezelt
0,1041 joch gewigen mac kein man
0,1042 der tiufe nieman vinden kan
0,1043 wanne sie sich verre breitet
0,1044 unde sich mit hoehe kleidet
0,1045 mit lenge unde ouch mit wîte
0,1046 sô daz sie gar vermîde
0,1047 ende unde aneginne
0,1048 daz keines herzen sinne
0,1049 sie mit nihte ergrîfen
0,1050 wen daz sie müge entslîfen
0,1051 unde ouch verre entrinnen
0,1052 ûz allen hôhen sinnen
0,1053 die urteile hatte beide geben
0,1054 umbe den tôt unde umbe daz leben
0,1055 wie der mennische muoste sterben
0,1056 unde leben mohte erwerben
0,1057 an gotes barmeherzicheit
0,1058 nâch des sunes wîsheit
0,1059 dô daz gerehticheit gesach
0,1060 daz in allen rehte geschach
0,1061 nâch rehte wirdicliche
0,1062 sie wurden vröuwedenrîche
0,1063 als der küninc Dâvît saget
0,1064 in deme psaltere unverzaget
0,1065 dâ er alsus inne las
0,1066 “– – –”
0,1067 vrouwe barmeherzicheit
0,1068 unde ouch ire swester wârheit
0,1069 gegen einander giengen
0,1070 mit grôzer vröuwede entviengen
0,1071 sie sich an den stunten
0,1072 niet langer vristen kunden
0,1073 wene mit guoten siten
0,1074 kuste ire swester vriden
0,1075 vrouwe diu gerehticheit
0,1076 mit zûhten wâren sie gemeit
0,1077 unde ouch tugentlîche vrô
0,1078 ergangen was ire kriegen dô
0,1079 ouch huop sich ein vröuweden schal
0,1080 von den hêrren überal
0,1081 vore des vürsten trône
0,1082 in süezeme sanges dône
0,1083 sie lobeten unde sungen
0,1084 ire harpfen suoze erklungen
0,1085 zimbeln unde seiten spil
0,1086 was dâ wunderlîchen vile
0,1087 unde ûzerwelter orgeln sanc

0,1088 sie seiten êwiclîche danc
0,1089 gote unde sîner wîsheit
0,1090 in ire sanges suezicheit
0,1091 âne zal unde âne mâze
0,1092 êwiclîche âne underlâz
0,1093 sie sungen alle gelîche alsus
0,1094 “ – – –
0,1095 hêrre kûninc heilic got
0,1096 – – –
0,1097 tugent genâde unde êre
0,1098 sollen wir iemer mêre
0,1099 dîner wirdicheite sagen
0,1100 sît dû daz mennische niet verzagen
0,1101 an dîner milticheite en lâst
0,1102 sît dû iz entvangen hâst
0,1103 zuo genâden nâch dem valle
0,1104 des loben wir dir alle
0,1105 als ein himellîchen voget
0,1106 der sîne genâde niet verzoget
0,1107 keinen manne der ir begert
0,1108 wene daz man schiere wirdet gewert
0,1109 wes man zuo dir gesinnet
0,1110 swer dich von herzen minnet
0,1111 dem wirdet êwiclîcher lôn
0,1112 dîn klârheit unde dîn hôher trôn
0,1113 unde dîn êwic goteheit
0,1114 sint ime êwiclîche bereit
0,1115 daz er die iemer schouwen sal
0,1116 âne mâze unde âne zal
0,1117 âne zal unde âne mâze
0,1118 êwiclîche âne underlâz
0,1119 stætclîche âne ende
0,1120 âne alle missewende
0,1121 mit vrôuweden sunder leide
0,1122 in stæter wirdicheite”
0,1123 des vürsten lop alsus erschein
0,1124 sie hullen alle gelîche in ein
0,1125 an des sanges dône
0,1126 sie giengen vore ime schône
0,1127 hin unde ouch her wider
0,1128 sie vielen alle nider
0,1129 an ire starke venje
0,1130 die himelische menige
0,1131 sungen alle gelîche alsô
0,1132 “ – – –
0,1133 tugent unde wirdicheit
0,1134 êwiclîche âne underscheit
0,1135 sagen wir alle gote

0,1136 deme himelischen vôte
0,1137 der unser ist gewaltic
0,1138 einlich und drîvaltic
0,1139 drilich unde ouch einvalt
0,1140 âne mâze unde ungezalt
0,1141 ist dîn gruntelôser rât
0,1142 der hier joch dort kein ende hât”
0,1143 her nâch eteswie lange was
0,1144 als ich in den buochen las
0,1145 dô iz den hêrren dûhte zît
0,1146 an deme alle tugent lît
0,1147 boten sande er in die lant
0,1148 unde hiez deme volke tuon bekant
0,1149 hoffenliche mære
0,1150 daz ein loesære
0,1151 schiere komen sulte
0,1152 der uns erloesen wulte
0,1153 von der hellen twange
0,1154 den uns der leide slange
0,1155 schuof mit ungetriuwe list
0,1156 als iuch hier vore gesaget ist
0,1157 prophêten unde wîssagen
0,1158 entstuonten in den selben tagen
0,1159 einer vore der ander nâch
0,1160 in was allen gelîche gâch
0,1161 zuo predigenne unde zuo sagenne
0,1162 unde gotes wort zuo tragenne
0,1163 überall in die werelt wît
0,1164 hêrr Salomon und Dâvît
0,1165 Moises . und Daniel
0,1166 Jonas . und Ezechiel
0,1167 Hosee . Jeremias
0,1168 Sybilla Malachias
0,1169 Isaias . und Habakuc
0,1170 und der wîssagere genuoc
0,1171 Jôêl . und Balaam
0,1172 Jop . Jakop . Isaac . Abraham
0,1173 disen hêrren lobelich
0,1174 und ouch der heidene eteslich
0,1175 quam himelische boteschaft
0,1176 von des heiligen geistes kraft
0,1177 daz sie vore wole wîsten
0,1178 wie uns got Jêsum Kristen
0,1179 daz ûzerwelte himelkint
0,1180 uns allen die bevangen sint
0,1181 mit der sünden überlast
0,1182 senden wulte als einen gast
0,1183 der von gote quæme

0,1184 unde uns zuo sune næme
0,1185 dem vater ûzer âhte
0,1186 wie er diz vollebrâhte
0,1187 daz hânt die hêrren vore gesaget
0,1188 unde swaz ir eteslich verdagete
0,1189 daz hât der ander ûz geleit
0,1190 sus hânt sie triuwelîche geseit
0,1191 hêrr Abraham der êrste
0,1192 der patriarchen hêrste
0,1193 der was von gote erliuhtet
0,1194 von himeltouwe erviuhtet
0,1195 von geistes viure entzündet
0,1196 sô daz ime wart gekündet
0,1197 gotes drîvalticheit
0,1198 unde der persônen underscheit
0,1199 an dem berge Mamre
0,1200 kante er nâch gotelîcher ê
0,1201 den sun unde ouch den vater
0,1202 den heiligen geist ire gater
0,1203 die drî wie sie gescheiden sint
0,1204 an der persônen underbinte
0,1205 und sint doch alle drî alein
0,1206 sus drilich ime got erschein
0,1215 sie kunden gotes willen tuon
0,1216 nû wart geboren in ein sun
0,1217 der was geheizen Isaac
0,1218 dâr nâch über manigen tac
0,1219 sô der zuo sînen jâren quam
0,1220 gotes willen er vernam
0,1221 wie got wulte ûf erden
0,1222 geboren mennische werden
0,1223 des sprach er zuo der stunte
0,1224 same ûz des vater munde
0,1225 gar wirdiclîchen schône
0,1226 von des sunes persône
0,1227 same ime gap der heiliggeist
0,1228 wizzen unde volleist
0,1229 von deme die wîsheit alle gêt
0,1230 er sprach als hier geschriben stêt
0,1231 “sehet â welich ein edel smac
0,1232 von mîneme sune riechen mac
0,1233 same eines vollen ackers ruch
0,1234 der sælden hât decheinen bruch
0,1235 deme got gegeben hât den segen
0,1236 und den himelischen regen”
0,1237 von Kriste sprach er solich lop
0,1238 nû was sîn sun hêrr Jakop
0,1239 der dritte patriarcha

0,1240 des heiligen geistes arche
0,1241 gotes genâden was er vol
0,1247 er sprach “daz rîche niemer mêr
0,1248 wirdet genomen in der juden ê
0,1249 von dem künne daz Judas biret
0,1250 und ein leitær ouch en wirdet
0,1251 von sîner hoffē niemer genomen
0,1252 der hêrre sî von êrste kumen
0,1253 der uns werden sal gesant
0,1254 er ist des beiten alle lant
0,1255 und daz volc ouch überal
0,1256 der hêre den man senden sal
0,1257 des ougen sollent lûter sîn
0,1258 verre klârer danne kein wîn
0,1259 sîne zene werdent zart
0,1260 wîzer vile danne milch ie wart”
0,1261 hêrr Moises her nâch entstuont
0,1262 der vile getriuwe gotes vriunt
0,1263 der mit getriuwicheit behielt
0,1264 daz er des volkes alles wielt
0,1265 mit gerihte unde mit der lêr
0,1266 alse ein herzoge hêr
0,1267 daz er vuorte in sîner hant
0,1268 mit gote von Egiptenlant
0,1269 von Pharaones getwange
0,1270 den sie hatten lange
0,1271 mit dieneste vile getragen
0,1272 biz sie gerieten klagen
0,1273 gote ire angest unde nôt
0,1274 biz got Moisi gebôt
0,1275 daz er daz israhêlische her
0,1276 vuorte durch daz rôte mer
0,1277 von Pharaones gebote
0,1278 sehet der rief hin zuo gote
0,1279 zuo dem vater wirdiclich
0,1280 er sprach “ei hêre ich biten dich
0,1281 sende den dû senden salt
0,1282 sich unser angest manicvalt”
0,1283 er sprach ouch zuo dem volke mêr
0,1284 dô er in überlas die ê
0,1285 “Israhel hoere mîn gebot
0,1286 ûz iuweren bruoderen wile iuch got
0,1287 wecken einen wîssagen
0,1288 welich sêle in iren tagen
0,1289 den prophêten niet vernimet
0,1290 joch verhoeret als ir gezimet
0,1291 die wirdet von sînes volkes schar
0,1292 verzalt unde ouch geverret gar”

0,1293 hier mügen wir alle merken bî
0,1294 wie unser hêre Moisi
0,1295 und disen hêren tet bekant
0,1296 wie Christus unser heilant
0,1297 kumen wolte der werde gast
0,1298 der wûnnenbære sterren glast
0,1299 der gibet êwiclîchen schîn
0,1300 kein vinsternisse mac gesîn
0,1301 swâ sîn lieht ie hine bequam
0,1762 von gote hatte sie die kraft
0,1763 daz sie sô wole gekündet hât
0,1764 den heimelîchen gotes rât
0,1765 als ieman in der juden art
0,1766 sie hât lützel iet gespart
0,1767 swaz wunderes got hât ûf geleit
0,1768 sie en habe iz allez vore geseit
0,1769 die dinc sie künfticlîche sach
0,1770 in ire schrifte die maget sprach
0,1771 “iz komet ein küninc von himel hôh
0,1772 der werlte er künftic ist alsô
0,1773 hier bî uns an der erden
0,1774 geinwürtic sal er werden
0,1775 er sal an der mennischheit leben
0,1776 unde sal der werlte urteil geben
0,1777 sô er danne ûf ertrîche
0,1778 dirre arbeite nietet sich
0,1779 verwerfen sollent gar die man
0,1780 ire schatz ire appetgote danne
0,1781 sô suochet er danne die hellen
0,1782 der porten sal er vellen
0,1783 künftic ist der erden sweiz
0,1784 gerihtes zeichen . der sterren kreiz
0,1785 rehte sal zuo mâle vergân
0,1786 die sunne sol ire schîn verlân
0,1787 iz wirdet der himel ouch verwant
0,1788 des mânen schîn vergêt zuohant
0,1789 sô werdent erhoehet alle tal
0,1790 die berge er alle nideren sal
0,1801 ouch kumet lîp und sêle dar
0,1802 die sal er alle urteilen gar
0,1803 sô sehent alle liute got
0,1804 boese . unte reht . den hôhen vôt
0,1805 diutischære[.] . heilic unde guot
0,1806 verborgene dinc er offen tuot
0,1807 hier mac sprechen ieweder man
0,1808 waz heimelîchheit er ie gewan
0,1809 er offenet alle herzen dâ
0,1810 der heiligen vleische doch iesâ

0,1811 vrîlich lieht wirdet ane gelege
0,1812 die süntær êwic vlamme neget
0,1813 sô wirdet in allen dâ zuo stunt
0,1814 schrîen zanebîzen kunt
0,1815 ouch himel unde erde wirdet verbrant
0,1816 mer beche . brunnen . sô zuohant
0,1817 trucken werdent alle
0,1818 daz ertrîche albetalle
0,1819 her nâch zuo brâchen sol vergân
0,1820 allez dinc sal ende hân
0,1821 ertrîche alsô erwegen sol
0,1822 daz man die hellen schouwen wole
0,1823 reinen sal ein swebelbach
0,1824 mit viure ouch in daz ungemach”
0,1825 nû sehet wie garwe hât gesaget
0,1826 dise heidenische maget
0,1827 von unsers hêrren künfte
0,1828 von sîner sigenunfte
0,1829 wie daz er die hellen brach
0,1830 vüresihticliche die maget sach
0,1831 daz lezzeste bibente urteil
0,1832 dâ allen sæligen liuten heil
0,1833 und den argen pîne entstât
0,1837 swer die houbetbuochstabe
0,1838 von oben an biz niden abe
0,1839 ordenlichen lesen kan
0,1840 dâ schouwet unde sihet man
0,1841 in kriechischen in latînen
0,1842 gar ordenliche erschînen
0,1843 dise namen gruntelôs
0,1844 Jêsus . Christus . hâgios
0,1845 theos . unde dâr nâch soter
0,1846 diz prüeve ein man diz vindet er
0,1847 behalten hân wir noch hier vore
0,1848 wie hêrr Nabuchodonosor
0,1849 ouch gotes sun erkante
0,1850 unde in mit namen nante
0,1851 unde anegesihticliche sach
0,1852 daz iedoch lange vore geschach
0,1853 ê daz der lobebære
0,1854 Christus geboren wære
0,1863 ouch hiez er schâchbanden
0,1864 an vuozen und an handen
0,1865 driu kinder umbe gerehticheit
0,1866 wande in was untugent leit
0,1867 daz was Ananias
0,1868 Mizahel Azarîas
0,1869 die warf man in den oven dâ

0,1870 der küninc selbe quam iesâ
0,1871 bî daz viur durch wunder
0,1872 aldâ sach er besunder
0,1873 vier jungelinge sunder bant
0,1874 in deme ovne unverbrant
0,1875 in wünniclicher schouwe
0,1876 sam in eines meien touwe
0,1877 sînen knechten sprach er zuo
0,1878 “ei hêrre waz gebiutes dû”
0,1879 riefen ie die knechte
0,1880 er sprach “nû saget rehte
0,1881 joch hiezen wir gebunden
0,1882 in disen selben stunden
0,1883 driu kindere werfen in die gluot”
0,1884 “jâ hêrre küninc hôchgemuot
0,1885 diz ist allez doch geschehen”
0,1886 dô sprach der küninc “jâ ich sihen
0,1887 vier jungelinge sunder bant
0,1888 in deme ovne unverbrant
0,1889 wandelieren her und dar
0,1890 sehet der dinge nam ich war
0,1891 und des vierden anegesiht
0,1892 ist gestellet anders niht
0,1893 wan gotes sun von himelrîche
0,1894 deme ist er überal gelîch”
0,2273 sus hân wir von den beiden
0,2274 von juden unde von heidenen
0,2275 alsô rehte wole vernomen
0,2276 wie unser hêre wolte komen
0,2277 her nider unser heilant
0,2278 der uns zuo trôste wart gesant
0,2279 biz dise hêrren alle gelîche
0,2280 jâ ir iegelich sunderlîche
0,2281 gelîche an eineme sinne
0,2282 unde ungelîche an beginne
0,2283 geredete waz er wiste
0,2284 von unseme hêrren Kriste
0,2285 als ime gap der heiliggeist
0,2286 kundschaft unde volleist
0,2287 wie er kumen sulte
0,2288 unde uns erloesen wulte
0,2289 von der hellen twange
0,2290 diz werte entriuwen lange
0,2291 von daz die werlt ane gienc
0,2292 biz Christum unse vrouwe entvienc
0,2293 lange jâr unde zîte vile
0,2294 als ich iuch doch bescheiden wile
0,2295 vûnf tûsent unde zwei hundert

0,2296 dâ von iedoch gesunderet
0,2297 was ein einlützic jâr
0,2298 sus seit die schrift . unde ist al wâr
0,2299 nû ist wole vrâgebære
0,2300 durch waz sô lange wære
0,2301 unser hêre unde unser trôst
0,2302 daz er niet lange . êr . hatte erlôst
0,2303 sîne vriunde unde sîne kint
0,2304 die in der vinsternisse blint
0,2305 alsô lange wâren
0,2306 in allen disen jâren
0,2307 sô lange zît sô lange tage
0,2308 in sô riuwelîcher klage
0,2309 daz ein vinsterlîche naht
0,2310 sô lange hatte sie bedaht
0,2311 daz sie nie lieht gesâhen
0,2312 als ie die wîsen jâhen
0,2313 Eva . Nôê . Abel . Adâm .
0,2314 Jop . Jakop . Isaac . Abraham .
0,2315 hêrr Dâvît . unde hêrr Salomon
0,2316 hêrr Moises . unde Aaron
0,2317 Simeon . Isaias .
0,2318 Johannes . Zacharias
0,2319 unde manic ander heilic man
0,2320 die got zuo allen zîten an
0,2321 riefen unde bâten
0,2322 unde gerten dirre genâden
0,2323 daz schiere erlîhtet würde
0,2324 ire angst unde ire bürde
0,2325 ire jâmer unde ire arbeit
0,2326 und daz vinstlerlîche leit
0,2327 ich meine des karkærs ungemach
0,2328 nû hoert durch waz die vrist geschach
0,2329 iz was allez umbe daz
0,2330 daz die liute deste baz
0,2331 zuo gote satzten ire beger
0,2332 wande iz ist wizzentlich . daz swer
0,2333 ein dinc mit lîhticheite hât
0,2334 daz er daz niet gar schône entwæhet
0,2335 mit sô ganzer wirdicheit
0,2336 als ob ein man mit arbeit
0,2337 daz dinc erwunnen muoste hân
0,2338 durch daz sô wart die vrist getân
0,2339 iz liebet daz dâ wirdet sûr
0,2340 waz uns durch wazzer unde durch viur
0,2341 mit arbeite trîbet
0,2342 unde waz uns über belîbet
0,2343 über her unde über hagel

0,2344 daz ist werder an deme zagel
0,2345 danne iz vüre allez wære
0,2346 sus ist woleveile unmære
0,2347 die prophêten alle gar
0,2348 unde aller guoten liute schar
0,2349 mit vlîze hatten vile begert
0,2350 daz sie wurden des gewert
0,2351 sie vlêheten unde bâten
0,2352 gelîche alle dirre genâden
0,2353 iegelîcher sunder gerte
0,2354 daz sie got des gewerte
0,2355 daz Christus unser heilant
0,2356 in an der mennischheit würde erkant
0,2357 und daz er senden wulte
0,2358 den er doch senden sulte
0,2359 und daz geschæhe in iren tagen
0,2360 sus hoere ich singen unde sagen
0,2361 sie gerten unsers hêren
0,2362 den sît nâch eineme sterren
0,2363 die hêren künige alle drî
0,2364 von Saba . Tarsus . unde Arabî
0,2365 mit prêsande suochten
0,2366 unde in zuostunt geruochten
0,2367 beten an als einen got
0,2368 der wære über alle hêren vôt
0,2368a daz was Krist Messias
0,2368b von deme hêrr Isaias
0,2368c alsô manic heilic wort
0,2368d hât gesprochen hier und dort
0,2369 nû mohte ein man wole vrâgen mêr
0,2370 sît unser hêre danne niet êr
0,2371 kumen wolte noch en quam
0,2372 wâr umbe er danne niet mêr en nam
0,2373 der jâre unde ouch der vriste
0,2374 wer diz gerne wiste
0,2375 den solen wir bescheiden
0,2376 unde an die rihte leiten
0,2377 diz was aber umbe daz
0,2378 daz der ungetriuwe haz
0,2379 den der tiuvel zuo uns hât
0,2380 iht aber vûnte boesen rât
0,2381 dâ mite er uns verirrete
0,2382 unde uns die genâde virrete
0,2383 obe unser hêre Jêsus Krist
0,2384 genomen hette langer vrist
0,2385 daz wir von der überdrôz
0,2386 iet würden hoffenuge blôz
0,2387 sô wæren wir aber danne verloren

0,2388 wær got noch eines durch uns geboren
0,2389 daz sehen wir wole schînen
0,2390 an juden Sarrazînen
0,2391 wande sie niet hoffenuge pflegen
0,2392 des hânt sie sich der helle erwegen
0,2393 jâ hoffenuge an Jêsum Krist
0,2394 an deme daz wære hoffen ist
0,2395 noch ist der sache harte vile
0,2396 der ich doch nû geswîgen wile
0,2397 unde aber grîfen hier zuo stete
0,2398 wider an die êrsten rede
0,2399 zuo Jerusalem ein priester was
0,2400 geheizen Zacharias
0,2401 ein bischov nâch der alten ê
0,2402 der mohte niunzic oder mêt
0,2403 jâr von lîbes alter hân
0,2404 gar altlich was der man getân
0,2405 der selbe man hatte ein wîp
0,2406 die hâte ouch einen alten lîp
0,2407 âne alle jugentlîche kraft
0,2408 sie was ouch ie unberhaft
0,2409 in allen iren jâren
0,2410 sie zwei nie kint gebâren
0,2411 die vrouwe hiez Elisabêt
0,2412 als in deme buoch geschriben stêt
0,2413 sô dirre bischov sîn gebet
0,2414 nâch der ê . sîn ambaht tet
0,2415 in deme tĒmpel als er pflac
0,2416 wande iz was gar ein hôher tac
0,2417 ein rouchvaz hatte er in der hant
0,2418 dô wart von gote aldar gesant
0,2419 ein engel âne vâre
0,2420 er stuont bî deme altære
0,2421 al zuo der rehter hende
0,2422 des selben altærs ende
0,2423 er sprach mit vriuntlîcher gire
0,2424 “vriunt Zacharias lose mir
0,2425 nim hine in dînen alten tagen
0,2426 ein kint daz sal dîn wirtinne tragen
0,2427 in ire alten lîbes schôz
0,2428 daz kindelîn daz sal werden grôz
0,2429 wande mit ime ist gotes hant
0,2430 war er kumet in die lant
0,2431 vile liute solent sicherlîche
0,2432 an deme tage vrôuwen sich
0,2433 wande Elisabêt gebiret
0,2434 und daz kint geboren wirdet
0,2435 dû salt ouch sicher wesen des

0,2436 sîn name wirdet Johannes
0,2437 gotes töufar unde sîn kneht
0,2438 sîne wege sal er machen reht
0,2439 überal in der wüestenheit
0,2440 hier sal er wesen zuo gereit”
0,2441 sô Zacharias dâ vernam
0,2442 den boten der von gote quam
0,2443 die boteschaft die selben rede
0,2444 die der engel dâ zuo stete
0,2445 von himelrîche brâhte
0,2446 in sînen muot er dâhte
0,2447 “ei vater heiliclîcher got
0,2448 ist iz Ernest oder spot
0,2449 man saget mir von kinde
0,2450 daz quæme uns von dem winde
0,2451 ich bin doch gar ein alter man
0,2452 wie sulte ich kint gezilen danne
0,2453 gar alt ist ouch Elisabeth
0,2454 daz alter ir sô nâhe gêt
0,2455 daz sie kinden niht en mac
0,2456 hier vore sie kinden niet en pflac
0,2457 in ire jungen jâren
0,2458 wie solte sie nû gebâren
0,2459 sulte sie kint gewinnen
0,2460 ich en werde es anders innen
0,2461 sô hân ich gelouben niet dâ zuo
0,2462 sage engel hêr waz wirbes dû”
0,2463 der engel dô mit zorne sprach
0,2464 dô er den ungelouben sach
0,2465 den Zacharias stalte
0,2466 unde in der rede valte
0,2467 die er ime sâr zuostunt
0,2468 tet von himelrîche kunt
0,2469 “sît dû nû an dirre vrist
0,2470 dirre dinge ungelöubic bist
0,2471 sô salt dû lôn dâ wider hân
0,2472 den dû lieber mohtes lân
0,2473 dû salt swîgen vürebaz mêr
0,2474 gesprochen salt dû niemer êr
0,2475 biz Elisabeth gebiret
0,2476 und daz kint geboren wirdet
0,2477 sô maht dû sprechen aber sît”
0,2478 nû was iz Iezuo an der zît
0,2479 daz der wirdiclîche bote
0,2480 vuor hin wider ûf zuo gote
0,2481 unlange zît dâr nâch ergienc
0,2482 Zacharias umbe vienc
0,2483 sîne wirtinne nâch der ê

0,2484 waz sulte langer rede mêr
0,2485 einen sun die vrouwe truoc
0,2486 hier mite sî der rede genuoc
0,2487 eiâ minniclîcher got
0,2488 durch dîne genâde und dîn gebot
0,2489 und durch die klâren suezicheit
0,2490 die dû hêre âne underscheit
0,2491 an dir êwiclîche weist
0,2492 sô gip mir dîne volleist .
0,2493 dînes heiligen geistes rât
0,2494 der manic herze erliuhtet hât
0,2495 daz er mir mîne sinne
0,2496 mit sîner zarten minne
0,2497 mîn herze unde mîn gemüete
0,2498 mit wârer minnen glüete
0,2499 sô heiliclîche entzünde
0,2500 daz ich von aller sünde
0,2501 gewaschen werde unde ouch getwagen
0,2502 daz ich wirdiclîche sagen
0,2503 von der zarten rôsen mûge
0,2504 daz iz ir zuo lobe tuge
0,2505 der lop über allen dingen swebet
0,2506 die mit dir êwiclîche lebet
0,2507 same ein hêre küniginne
0,2508 sus tuo mir dîne genâde schîn
0,2509 aleine ich doch wole wizze
0,2510 waz sich ieman gevlizze
0,2511 daz er sie gelobete wole
0,2512 ire lop wart doch nie lobes vol
0,2513 want waz nû ist unde ouch ie was
0,2514 loup . kriutere . bluomen . unde gras
0,2515 unde iemer mêr sal werden
0,2516 créatiure ûf erden
0,2517 künde daz allez sprechen
0,2518 unde lop von lobe brechen
0,2519 iz en künde deme niht doch gelîchen
0,2520 iz muoste ire lobe entwîchen
0,2521 doch mêret iz des lobes schar
0,2522 nû nemen alle liute war
0,2523 wer dise vrouwe mûge sîn
0,2524 an der diz hôhe lop wile lîn
0,2525 nâch sô werden prise
0,2526 daz meister nie sô wîse
0,2527 wurden . die ergründen
0,2528 ire lop nâch wurde künden
0,2529 iz ist der engele vrouwe
0,2530 unde ist ein rôse in touwe
0,2531 die bliuwet schône in aller zît

0,2532 an ir vile sælicheite lît
0,2533 sie ist aller genâden ein vollez vaz
0,2534 nû hilf ouch dû mir vrouwe baz
0,2535 mêr sprechen danne ich kunne
0,2536 dû bis der himele wünne
0,2537 dû lilje vîol rôse
0,2538 dû zarte zitelôse
0,2539 dû porte des paradîses
0,2540 dû stam des mandelrîses
0,2541 daz in den tÊmpel wart gestaht
0,2542 unde brâhte vruht in einer naht
0,2543 dû tûbe wandels âne
0,2544 dû liuhtes als der mâne
0,2545 in diz enelende verre
0,2546 dû liechter morgensterre
0,2547 dû schînes same die sunne tuot
0,2548 den armen gibes dû hôhen muot
0,2549 den süntæren endelîchen trôst
0,2550 der hâs dû vile von pîne erlôst
0,2551 dû turteltûbe dû adelspare
0,2552 dû fênix unde dû adelare
0,2553 dû fînez golt dû gimme –[...]
0,5364 die juden aber rieten
0,5365 man sulte des grabes nemen war
0,5366 dar wart gesant ein ritte schar
0,5367 daz sie wole goume næme
0,5368 daz ieman dar bequæme
0,5369 der den korper wolte stelen
0,5370 die jungeren mohten in verheltn
0,5371 unde spræchen sunder wân
0,5372 “unser hêrre ist ûf gestân
0,5373 von deme tôde sicherlîche”
0,5374 sô hüebe ein grôzer zwîvel sich
0,5375 noch was dem tiuvel unerkannt .
0,5376 daz iz was unser heilant
0,5377 Krist gotes sun der dise nôt
0,5378 dise pîne unde disen tôt
0,5379 alsô durch uns erliten hât
0,5380 der vûre sîne hantgetât
0,5381 hât gesezzen ûf gegeben
0,5382 sîn gebenediet leben
0,5383 daz er uns vröuwede koufete
0,5384 uns von sünden toufete
0,5385 der milte und ouch der guote
0,5386 in sîneme reinen bluote
0,5387 unde uns der hellen machete vrî
0,5388 daz uns iemer offên sî
0,5389 des himelrîches klârheit

0,5390 in êwiclîcher stâticheit
0,5391 er wânte daz er wære
0,5392 ein ander zouberære
0,5393 des quam er in die hellen
0,5394 er sprach “jâ ir gesellen
0,5395 ir hât vilelîhte wole vernomen
0,5396 daz ûf ertrîche was bekomen
0,5397 ein man der wunder hât getân
0,5398 wonders hât er vile begân
0,5399 er machete lame liute gên
0,5400 tôten tet er ûf stên
0,5401 den stummen tet er ûf den munt
0,5402 er machete der siechen vile gesunt
0,5403 unde ander zeichene tet er vile
0,5404 nû hoeret waz ich iuch sagen wile
0,5405 waz ich hân gebrûwen nû
0,5406 der man verrâten ist iezuo
0,5407 geslagen unde gefangen
0,5408 unde an ein holz gehangen
0,5409 dâ an er ist gestorben
0,5410 sehet daz hân ich erworben
0,5411 saget quam er noch iet her”
0,5412 die tiuwele riefen . “wer â . wer
0,5413 jâ wer mac der man gesîn
0,5414 daz er hier niet wirdet schîn
0,5415 daz er niet her bekumen ist
0,5416 wær iz ouch niet der hêrre Krist
0,5417 von deme die wîssagere
0,5418 ruofen dise mære
0,5419 daz er uns sulte stoeren hier”
0,5420 diz schrûwen unte riefen sie
0,5421 sie jâhen ouch “der selbe rât
0,5422 zuo guote ich wæne uns niet ergât”
0,5423 nû hoeret die rede vûrebaz mêr
0,5424 der ich doch hân begonnen êr
0,5425 waz trôstes in die hellen
0,5426 Adâm unde sînen gesellen
0,5427 quam sô wirdiclîche
0,5428 mit diseme vûrsten rîche
0,5429 jâ in der zît quam iz alsô
0,5430 daz unser hêrre vuor iedô
0,5431 zuo der hellen durch gewin
0,5432 er sprach “ir vûrsten lâzet in
0,5433 balde tuot ûf iuwer tor”
0,5434 die tiuwele riefen “wer dâ vore”
0,5435 dô sprach der heilant lobelich
0,5436 “iz ist ein hôher vûrste rîche
0,5437 ein küninc rehte lobesam”

0,5438 die tiuvele alle wunder nam
0,5439 wer dirre wunderære
0,5440 der êren küninc wære
0,5441 si riefen alle “jârâ . jâ
0,5442 wer ist der wer stürmet dâ”
0,5443 dar unde dar er aber stiez
0,5444 in er balde lâzen hiez
0,5445 einen hôhen küninc hêr
0,5446 die tiuvele wunderte aber mêr
0,5447 wer der gewaltigære
0,5448 der êren küninc wære
0,5449 mit ein si alle riefen sô
0,5450 “jârâ jâ wer stürmet dâ
0,5451 wer ist der küninc rîche
0,5452 der sô gewalticliche
0,5453 stürmet unser porten hier”
0,5454 diz riefen unde schrûwen sie
0,5455 “jâ wer mac der küninc wesen”
0,5456 hier vone hêrr Dâvît hât gelesen
0,5457 vore hine harte lange
0,5458 in sîneme psaltersange
0,5459 “– – –”
0,5460 sus hât er uns bescheiden des
0,5461 “got die porten nider brach”
0,5462 sô daz der guote Adâm gesach
0,5463 er sprach “iz kumet der heilant
0,5464 wande ich sihen dise hant
0,5465 die mich unde alle dinc geschuof”
0,5466 aldâ huop sich ein vröuweden ruof
0,5467 unde ein wünniclicher braht
0,5468 wart von den sêlen dô gemachet
0,5469 dô sie den heilant sâhen an
0,5470 iegelicher vröuwen sich began
0,5471 sîn pflegær Josepch sprach iesâ
0,5472 “der êren küninc kumet dâ
0,5473 mîn trôst . mîn got . mîn heilant
0,5474 deme ich dicke mîne hant
0,5475 reichete in sîner kintheit
0,5476 unde ime dienestes was gereit
0,5477 mit alsô ganzen triuwen
0,5478 er wile uns heil erniuwen
0,5479 der selbe vürste rîche
0,5480 dort komet wünnicliche”
0,5481 hêrr Simeon der guote
0,5482 sprach ouch mit vrôwem muote
0,5483 “ich sihen den küninc lobesam
0,5484 den ich in mîne hende nam
0,5485 unde in ûf den altær truoc

0,5486 wole uns wir hân nû vröuweden genuoc
0,5487 hier kumet unser aller trôst
0,5488 er hât mit triuwen uns erlöst”
0,5489 hêrr Dâvît in den vröuweden sanc
0,5490 sîn harpfe suoze dâ erklanc
0,5491 er sprach “diz ist der hêre
0,5492 der wâre sunnensterre
0,5493 der sînen heimelîchen rât
0,5494 dâ dicke mir verkündet hât”
0,5495 Johannes ouch baptiste
0,5496 sprach in der selben vriste
0,5497 “ich sihen den ich toufete
0,5498 der mich sô tiure koufete
0,5499 mit sîneme zarten bluote
0,5500 er komet dort der guote”
0,5501 hêrr Moises mit vröuweden sprach
0,5502 dô er der êren küninc sach
0,5503 “wole mich ich sihen den selben got
0,5504 der mir sîn ê und sîn gebot
0,5505 mit sîneme vinger selbe schreip
0,5506 bî dem ich alsô lange beleip
0,5507 an dem berge Sinai
0,5508 biz die ê geschriben dâ
0,5509 von dem lobelîchen wart
0,5510 der kumet in wünniclîcher vart”
0,5511 ouch sprach mit triuwen Abraham
0,5512 “ich sihen den küninc lobesam
0,5513 den schepfær unde den hêrren mîn
0,5514 der mir wirdiclîche schîn
0,5515 nâch sîner gotelîchen[.] ê
0,5516 wart an dem berge Manbrê”
0,5517 Nôê sprach ouch sâr zuo stunt
0,5518 “ich sihe den gotelîchen munt
0,5519 der mich die arken machen hiez
0,5520 unde mich alsô genesen liez
0,5521 in milticlîcher güete
0,5522 vore der wazzer vlüete”
0,5523 swaz gotes vriunde dâ wâren
0,5524 die mohten wole gebâren
0,5525 alle wirdiclîche
0,5526 daz sie sô lobelîche
0,5527 der êren küninc schouwete
0,5528 unde mit ime ervröuwete
0,5529 vröuwede hatten sie mit ein
0,5530 wan in sô wirdiclîche erschein
0,5531 der êren got der hêre
0,5532 der lichten sunnen sterre
0,5533 mit ganzer klârheite

0,5534 an dirre vinsterkeite
0,5535 dâ vone hêrr Isaias
0,5536 hier vore in sîner schrifte las
0,5537 in sîneme vrôuweden sange alsus
0,5538 “– – –”
0,5539 alsô beschreip er disen rât
0,5540 er sprach “diz volc daz lange hât
0,5541 gewesen in vinsternisse
0,5542 sehet daz hât nû gewisse
0,5543 alsô klâr ein licht ersehen
0,5544 daz heil ist in aldâ geschehen
0,5545 die in des tôdes geinôte
0,5546 wâren in gemeinede
0,5547 in vinsterkeite pînen
0,5548 den hât begunnen schînen
0,5549 in der hellen offenbâr
0,5550 ein licht gar lûter unde klâr”
0,5551 der küninc Dâvît disen rât
0,5552 gar hêrlîche ouch beschriben hât
0,5553 an sîneme sange in dirre wîs
0,5554 “– – en es
0,5555 ein iecht gar lûter unde klâr
0,5556 hât geschinen offenbâr
0,5557 den gerechten in der vinsterkeit
0,5558 den milten hêrren goteheit”
0,5559 von den sêlen überal
0,5560 huop sich ein wünniclicher schal
0,5561 si sungen unde wâren vrô
0,5562 si sungen iedoch alle alsô
0,5563 “nû bist dû kumen wole bereit
0,5564 des wir in dirre vinsterkeit
0,5565 gebeitet hân sô lange vrist
0,5566 dô dû gewalticlicher Krist
0,5567 noch hînt in dirre selben naht
0,5568 in dîner gotelîchen maht
0,5569 ûz diseme karkær lôstes
0,5570 unde uns lieplîche trôstes
0,5571 uns hât mit inniclicher gire
0,5572 erlanget hêrrer vile nâch dir
0,5573 daz dû uns in den pînen
0,5574 trôstlich woltes schînen
0,5575 diz hât dû hêrrer nû getân
0,5576 rehte als wir begeret hân
0,5577 des sîn wir worden hier gewar”
0,5578 hin vuor die lobelîche schar
0,5579 mit deme vürsten lobesam
0,5580 alsoich ritterschaft gezam
0,5581 deme künige rîche

0,5582 er vuorte sie lobelîche
0,5583 zuo dem paradîse
0,5584 aldâ liez sie der wîse
0,5585 dâ beliben sie die vierzic tage
0,5586 sunder wê unde âne klage
0,5587 dô nû die ander naht ergienc
0,5588 êr daz morgenlicht entvienc
0,5589 unde der sabbat was vergân
0,5590 von himel quam dô sunder wân
0,5591 ein sô grôzer donerslac
0,5592 daz die ritterschaft erschrac
0,5593 den daz grap bevolhen was
0,5594 si wurden bleich sam als ein wahs
0,5595 si vielen nider von der nôt
0,5596 gelîcher wîse sie wâren tôt
0,5597 die erde biben ouch began
0,5598 Jêsus der gotelîche man
0,5599 jâ der wâre heilant
0,5600 ûz deme grabe stuont zuohant
0,5601 an deme selben tage vruo
0,5602 vernemet wunder aber nû
0,5603 daz ich mit wârheit sagen wile
0,5604 der tôten korper harte vile
0,5605 erstuonten ûf mit deme dô
0,5606 si giengen in die stat iesâ
0,5607 daz si mohten schouwen
0,5608 jâ . meide . manne . vrouwen
0,5609 der lobelîche Dâvît
0,5610 von der ûferstende zît
0,5611 uns ûzer mâzen wole beschiet
0,5612 dô er sprach “– –”
0,5613 alsô legete er ûz den rât
0,5614 “daz ertgerûste erbibet hât
0,5615 geruowet hât iz sâr zuohant
0,5616 dô got der hêrre heilant
0,5617 ûf in deme gerihte erstuont”
0,5618 jâ der werde gotes vriunt
0,5619 in deme psalter aber sprach
0,5620 jûbilierende unde jach
0,5621 “– – –”
0,5622 nû hoeret wie man daz verstâ
0,5623 tief von sinne scharpfe
0,5624 iz quît “stant ûf mîn harpfe
0,5625 stant ûf mîn psalterium”
0,5626 diz diutet Jêsum Christum
0,5627 von des persônen sprach er dô
0,5628 “– –
0,5629 des morgenes vruo wile ich erstân”

0,5630 nû sulet ir hoeren sunder wân
0,5631 wie sich doch daz selbe spil
0,5632 unsem hêrren gelîchen wile
0,5633 die harpfe unde daz psalterium
0,5634 sint beide ungespannen tump
0,5635 si sint ungeslagen toup
0,5636 rehte sam ein lindenloup
0,5637 daz von dem boume vellet
0,5638 swer sie gespannen stellet
0,5639 unde slehet dar unde aber dar
0,5640 ire süezicheit wirdet man gewar
0,5641 des ordenlîchen sanges
0,5642 des süezen seitenklanges
0,5643 in aller wîse tet alsus
0,5644 unser hêrre Christus
0,5645 jâ sô der hêre heilant
0,5646 an daz kriuze sâr zuohant
0,5647 gezwicket unde geslagent wart
0,5648 gespannen unde sêre gesparrt
0,5649 geslagen dar unde aber dar
0,5650 dô wirdet sâr zuohant gewar
0,5651 der gotelîchen süezicheit
0,5652 die gotes vriunden ist bereit
0,5653 zuohant der süezen harpfen sanc
0,5654 hin abe zuo der hellen klanc
0,5655 unde in die werlt überal
0,5656 der harpfen süezicheit erschal
0,5657 alsô stuont ûf der hêre vruo
0,5658 bereitet hatten sich iezuo
0,5659 die Marîen alle drî
0,5660 Magdalena Jacobi
0,5661 unde die dritte Salomê
0,5662 die hatten unsen hêrren êr
0,5663 liep an sîneme lebene
0,5664 sie hatten in vile ebene
0,5665 ouch an sîneme tôde wert
0,5666 si hatten alle drî begert
0,5667 daz sie wolten salben
0,5668 sîne wunden allenthalben
0,5669 si giengen alle drî hin abe
0,5670 hinewert zuo deme grabe
0,5671 dâ der heilant was geleit
0,5672 ire salben hatten sie bereit
0,5673 si sprâchen alle drî zuo ein
0,5674 “wer sal uns rücken disen stein”
0,5675 sô sprach die minniclîche schar
0,5676 nû nâmen sie entriuwen war
0,5677 daz der stein was abe getân

0,5678 ûf hôher gerieten sie dô gân
0,5679 unde erschrâken sêre .
0,5680 wande ein engel hêre
0,5681 in deme selben grabe saz
0,5682 des trâten sie ûf hôher baz
0,5683 dâ sprach der engel “saget mir
0,5684 ir vrouwen drî wen suochet ir
0,5685 durch waz ir sus erschrocken sît”
0,5686 die vrouwen sprâchen in der zît
0,5687 “Jêsum dâ von Nazarêt
0,5688 nâch deme unser suochen gêt”
0,5689 daz was der vrouwen widerrede
0,5690 der engel aber sprach zuo stete
0,5691 “ir sullet iuwer vorhte lân
0,5692 ich sage iuch sunder allen wân
0,5693 ir suochet in vergebene
0,5694 er ist zuo deme lebene
0,5695 von deme tôde erstanten
0,5696 nû schouwet her zuo handen
0,5697 die stat wâ er gelegen hât
0,5698 daz ist sîn kleit unde ist sîn wât
0,5699 ir gêt unde îlet balde hin
0,5700 zuo sînen jungeren saget in
0,5701 saget in unde Petrô
0,5702 daz sie wirdicliche vrô
0,5703 alle nû mit gote sîn
0,5704 erstanten ist der trehtîn”
0,5705 Maria Magdalena
0,5706 beleip iedoch aleine dâ
0,5707 iz huop sich von der reinen
0,5708 ein vriuntlichez weinen
0,5709 ire heil ire gotelîchen trôst
0,5710 der sie von sünden hatte erlôst
0,5711 den hatte si sô rehte wert
0,5712 daz sie mit triuwen hât begert
0,5713 daz ir der hêre sulte
0,5714 erschînen ob er wulte
0,5715 sie sach bî sich unverre
0,5716 dâ stuont iedoch der hêre
0,5717 nâhe bî der heilant
0,5718 ein spaden hatte er an der hant
0,5719 sam ein gartenære
0,5720 sie en wiste wer er wære
0,5721 er gruozte si . er sprach ir zuo
0,5722 “waz weines unde waz suoches dû”
0,5723 “Jêsum hêre von Nazarêt
0,5724 an deme mîn trôst mîn leben stêt
0,5725 bis dû sîn iet worden gewar

0,5726 sô wîse dû mich hêrre dar
0,5727 sage hâs dû in ûf gehabt
0,5728 wâ dû in hêrre hâst begraben
0,5729 ich hette gerne in stunten
0,5730 gesalbet sîne wunden”
0,5731 mit namen er si nante
0,5732 zuohant er si erkante
0,5733 ein hôhe vrôuwede si begôz
0,5734 dâ vone si dise wort ûz gôz
0,5735 “gebenediet muost dû sîn
0,5736 mîn heil . mîn trôst . mîn trehtîn”
0,5737 sie wulte in hân gegriffen ane
0,5738 er sprach “ein lützel trit hin dannen
0,5739 dû salt nû niet rüeren mich”
0,5740 sô sprach der heilant lobelich
0,5741 “zuo mînen jungeren île hin
0,5742 und zuo Petrô dû sage in
0,5743 daz si zuo Galilê kumen
0,5744 sage in swaz dû hâst vernomen”
0,5745 waz sal lange rede mêr
0,5746 si quâmen hin zuo Galilê
0,5747 dâ sâhen si den heilant
0,5748 dâ in sicherlîche erkant
0,5749 iedoch aleine Thomas
0,5750 der nû der zweliver einer was
0,5751 wolte iedoch gelouben niet
0,5752 biz in der heilant unterschiet
0,5753 daz er iz sicher wære
0,5754 er sprach “dû zwîvelære
0,5755 alher in mîne wunden grîf”
0,5756 aldâ wart sîn geloube rîf
0,5757 nû wær niet wole dâ hinden beliben
0,5758 ich en hette ein teil beschriben
0,5759 daz uns benæme disen wân
0,5760 wie got hette sô getân
0,5761 daz die klære kûninginne
0,5762 ein sloz . ein tĕmpel . unde ein schrîn
0,5763 der hôchgelobeten goteheit
0,5764 ein muoter aller suezicheit
0,5765 noch ungetroestet wære
0,5766 doch von der selben swære
0,5767 die ire zarte sêle entvienc
0,5768 dô ire kint versniten hienc
0,5769 gezwicket an des kriuzes boum
0,5770 bescheiden wile ich iuch den troum
0,5771 aleine ich iz doch nie gelas
0,5772 daz si daz êrste mennische was
0,5773 die unses hêrren trôst vernam

0,5774 gar vruo ir hôhe vröuwede quam
0,5775 dâ vone hêrr Dâvît sprach alsus
0,5776 “– – – –
0,5777 der âbent allez weinen hât
0,5778 vröuwede an dem morgene vruo erstât”
0,5779 alsus was unser hêrre
0,5780 zuo aller zît unverre
0,5781 von sînen vriunden hier unde dâ
0,5782 iezunt hier nû anderswâ
0,5783 swâ er si wiste dâ bî ein
0,5784 der hêrre vriuntlîche in erschein
0,5785 swâ sie wâren hier unde dort
0,5786 zarte lêre süeze wort
0,5787 ûz sînen munde vluzzen
0,5788 die sam ein tou beguzzen
0,5789 ire herze unde ouch ire sinne
0,5790 mit gotelîcher minne
0,5791 ire sêle kunde er salben
0,5792 er was allenthalben
0,5793 er tranc unde az als êr mit in
0,5794 er vuor underwîlen hin
0,5795 zuo dem paradîse
0,5796 unde gap ouch in die spîse
0,5797 der himelischen süezicheit
0,5798 die sîn hatten dâ gebeitet
0,5799 jâ die er ûz der helle nam
0,5800 sus her unde dar der heilant quam
0,5801 des treip er an die vierzic tage
0,5802 nû loset rehte waz ich iuch sage
0,5803 sô die vierzic tage dô
0,5804 ergiengen unser hêrre iesô
0,5805 mit sînen jungeren tranc unde az
0,5806 bî in er vriuntlîche saz
0,5807 er lâрте unde sagete in
0,5808 wie er nû sulte varen hin
0,5809 zuo deme vater lobelich
0,5810 er sprach “der vater wirdiclich
0,5811 sal iuch senden sînen geist
0,5812 der sal iuwer volleist
0,5813 zuo wîsheit unde zuo genâden sîn
0,5814 er tuot iuch alle genâde schîn
0,5815 von Jerusalêm sulet ir niet gân
0,5816 dâ sullet ir die genâde entvâhen
0,5817 sô er die hatte ûz gelesen
0,5818 dâ sulet ir bî einander wesen”
0,5819 der lobelîche sâr zuo stat
0,5820 gein Sinai dem berge trat
0,5821 mit ime die jungeren quâmen dar

0,5822 mit einer lobelîchen schar
0,5823 als eineme hêrren wole gezam
0,5824 daz her er allez mit im nam
0,5825 daz der gotelîche trôst
0,5826 ûz der helle hatte erlôst
0,5827 si sungen unde wâren vrô
0,5828 si vuoren hin in jubilô
0,5829 daz hât hêrr Dâvît unverdaget
0,5830 er hât iz allez vore gesaget
0,5831 in sîneme psaltersange alsus
0,5832 sprach er “– –”
0,5833 got der küninc rîche
0,5834 vuor ûf gar wirdiclîche
0,5835 in vröuweden jûbilierende
0,5836 hêrlîche busûnierende
0,5837 als in eines hornes klange
0,5838 den tôt er in betwange
0,5839 vuorte und bant in beneben
0,5840 den liuten gâbe hât gegeben
0,5841 daz wolken sie nû schiere entvienc
0,5842 der hêrre in sîn rîche gienc
0,5843 mit ime daz wünniclîche her
0,5844 der hêrr saz nû in der gewer
0,5845 zuo sînes vater rehten hant
0,5846 alsô vuor ûf der heilant
0,5847 dô nû der pfingestac erstuont
0,5848 die lobelîche gotes vriunde
0,5849 wâren bî einander gar
0,5850 zuo Jerusalem an einer schar
0,5851 die hêrlîche menige
0,5852 lâgen an ire venje
0,5853 vasten weinen sîn gebet
0,5854 ieweder man besunder tet
0,5855 sie sâzen alle dâ bî ein
0,5856 dô in der trôst von gote erschein
0,5857 iz quam ein snelliclîcher bôz
0,5858 alse eines gâhen windes dôz
0,5859 dâ vone ein hûs erbiben sol
0,5860 daz hûs wart allez genâden vol
0,5861 der geist aldâ schuof wunder
0,5862 er besaz besunder
0,5863 iegelîchen wirdiclîche
0,5864 er besaz si lobelîche
0,5865 alle tugent alle kunst
0,5866 si hatten gotelîche gunst
0,5867 si wâren sunder meisterstuol
0,5868 kumen hier zuo hôher schuole
0,5869 ire meister was der heilige geist

0,5870 der gap in werde volleist
0,5871 zuo tugent unde zuo wîsheit
0,5872 in was zuo stete dâ bereitet
0,5873 daz sie kunden alle schrift
0,5874 daz wunder wart aldâ gestift
0,5875 daz in daz allez kündic was
0,5876 daz ir kein doch nie gelas
0,5877 in was alle sprâche kunt
0,5878 die kunden sie aldâ zuo stunt
0,5879 durhnehticliche als iren namen
0,5880 hier vone die liute hatten gamen
0,5881 dô sie die hêrren sâhen
0,5882 geliche alle sie dâ jâhen
0,5883 si wæren wînes trunken
0,5884 dâ was iz von den vunken
0,5885 des heiliggeistes glüete
0,5886 dâ vone wuohs ire gemüete
0,5887 dâ wâren ûz alleme lande
0,5888 liute maniger handen
0,5889 die hôrten alle ire sprâche dâ
0,5890 si nam wunder alle iesâ
0,5891 si jâhen “wie mac diz gesîn
0,5892 daz wunder daz hier wirdet schîn
0,5893 wer hât is gesehen mêr
0,5894 die liute sint von Galilê
0,5895 die alle sprâche kôsant hier
0,5896 wer gesach daz wunder ie”
0,5897 diz ist niet underwegen beliben
0,5898 hêrr Dâvît hât iz ouch beschriben
0,5899 in deme psalter aber êr
0,5900 er sprach “– – e
0,5901 kein sprâche ist niergen noch kein rede
0,5902 man habe ire stimme sâr zuo stete
0,5903 gehôrt der hêrren sâr zuo stunt”
0,5904 hêrr Jôêl hât iz ouch verkunt
0,5905 von gotelicher volleist
0,5906 er sprach “ich wile mînen geist
0,5907 giezen ûf aller hande man
0,5908 iuwer kint wîssagent danne”
0,5909 Mathias iedoch wider trat
0,5910 an des ungetriuwen stat
0,5911 der sînen hêrren sô verriet
0,5912 unde bitterliche von in schiet
0,5913 sîn bischetuom ein ander hât
0,5914 alsô ouch in deme psalter stât
0,5915 zwelif ir aber wâren
0,5916 sam in den vorderen jâren
0,5917 ervüllet wart der hêrren zal

0,5918 die noch hêrr Paulus mêren sal
0,5919 kurzêliche wurden sie versant
0,5920 al umbe unde umbe in alle lant
0,5921 zuo predigenne unde zuo sagenne
0,5922 unde gotes wort zuo tragenne
0,5923 al umbe in die werlt wît
0,5924 dâ vone der küninc Dâvît
0,5925 gesaget ordenliche hât
0,5926 in sîner buoch geschriben stât
0,5927 iedoch des hêrren lobesam
0,5928 alsus “ – – –
0,5929 in alle lant ire stimme erschall
0,5930 ire wort in allen enden hal”
0,5931 si predigeten unde lârteten
0,5932 der liute sie vile bekârteten
0,5933 zuo kristenlichem lebene
0,5934 zuo lâzenne ûf zuo gebenne
0,5935 aller werlte êre
0,5936 diz was der hêrren lêre
0,5937 wunder sie dâ stalten
0,5938 appetgote si valten
0,5939 ire tÊmpel wurfen si dâr nider
0,5940 si macheten hôhe münster wider
0,5941 klôster unde zellen
0,5942 pfarre unde ouch kappellen
0,5943 sus wuohs der kristenheite kraft
0,5944 zuo meist doch von der heidschaft
0,5945 die hôrten gerne gotes wort
0,5946 in allen landen hier unde dort
0,5947 die juden wâren in zuo hart
0,5948 iedoch ir vile getoufet wart
0,5949 die heiligen guzzen ouch ire bluot
0,5950 si dûhte sælic unde guot
0,5951 daz si trâten an daz spor
0,5952 daz in sô lobeliche vore
0,5953 ire heilær unde ire hêrre trat
0,5954 si hielten sich an disen pfat
0,5955 sô sie mohten allermeist
0,5956 dâ half in zuo der heilige geist
0,5957 ouch tâten si besunder
0,5958 gar lobeliche wunder
0,5959 als in von gotelicher maht
0,5960 gegeben was unde ûf gelaht
0,5961 si tâten lame liute gên
0,5962 si tâten tôten ûf erstên
0,5963 si tâten halzen springen
0,5964 die stummen liute singen
0,5965 malâten sie reinigeten

0,5966 zuo gote sie vereinigten
0,5967 si macheten blinden sehente
0,5968 an Jêsum Christum jehente
0,5969 si gâben ouch den touben
0,5970 gehoerde unde rehten gelouben
0,5971 besezzen man si ledigeten
0,5972 si lârtten unde predigeten
0,5973 gelouben hân an einen got
0,5974 der aller dinge hât gebot
0,5975 wie die drîvalticheit
0,5976 hât êwiclîche underscheit
0,5977 unde eine einicheit doch hât
0,5978 einvalt unde drîvalt si stât
0,5979 jâ der sun unde ouch der vater
0,5980 und der heilige geist ire gater
0,5981 drî an drîn persônen sint
0,5982 âne der persônen underbinte
0,5983 und sint doch alle drî alein
0,5984 mêt joch minnere ist ir kein
0,5985 wan die gotelich gewalt
0,5986 ist allez einlich unde drîvalt
0,5987 an persônen sint ir drî
0,5988 swie einic doch ire wesen sî
0,5989 die persônen sunderlich
0,5990 gar eigenlîche scheident sich
0,5991 an sunderlîcher krefte
0,5992 an sunder eigenschefte
0,5993 mêt joch minnere ist ir kein
0,5994 ir drîer wesen ist alein
0,5995 hier mac man prûeven wunder
0,5996 persônen drî besunder
0,5997 machent alle ein einicheit
0,5998 wesente an der goteheit
0,5999 drî persônen sint ein got
0,6000 swie doch der vater hâ gebot
0,6001 und der sun die wîsheit
0,6002 der geist des willen suezicheit
0,6003 wîsheit . wille . unde ouch gebot
0,6004 ist allez doch ein einic got
0,6005 gelîche êwic . gelîche gewaltic
0,6006 gar einlich gar drîvaltic
0,6007 der vater ane gênte ist got
0,6008 swie er habe doch gebot
0,6009 got ist ouch wâre sun
0,6010 swie er wîsheit mûge tuon
0,6011 got ist ouch der heilige geist
0,6012 swie hê des willen hâ dâr meist
0,6013 wîsheit wille unde ouch gebot

0,6014 ist aber doch ein einic got
0,6015 ire wesen niht en drîet sich
0,6016 swie die persônen sunderlich
0,6017 haben alle ire sunder kraft
0,6018 unde alle ire sunder eigenschaft
0,6019 einlich ist ire wesen ie
0,6020 diz einiget unde drîet sie
0,6021 der sun entvienc die mennischheit
0,6022 nâch des geistes suezicheit
0,6023 dâ gap der vater zuo gebot
0,6024 sus sint die drî ein einic got
0,6025 sus ist daz êwiclîche leben
0,6026 einlich unde drilich underweben
0,6027 ebenêwic ebenhêr
0,6028 sehet daz was dirre hêrren lêr
0,6029 diz predigeten unde lârtten sie
0,6030 den gelouben liezen sie uns hier
0,6031 den sollen wir doch iemer hân
0,6032 hier mite sollen wir bestân
0,6033 kunde ich nû wirdiclîche kôsen
0,6034 von der hôchgelobeten rôsen
0,6035 die vrouwe ob allen vrouwen ist
0,6036 die unse hêrre Jêsus Krist
0,6037 zuo muoter ûz erwelet hât
0,6038 sô sulte ich vinden einen rât
0,6039 daz ich en dorfte niet verdagen
0,6040 ich en sulte ein lûtzel sagen
0,6041 von der lobelîchen vart
0,6042 wie die kûninginne wart
0,6043 gevuort sô wûnniclîche
0,6044 hine zuo himelrîche
0,6045 mac ich nû reden wole
0,6046 sô hoeret waz ich iuch sagen sol
0,6047 waz eigenlîche ich sprechen mac
0,6048 Maria hiute ûf disen tac
0,6049 alsus disen minnen brief
0,6050 den hêrr Salomon doch rief
0,6051 von des heiligen geistes wegen
0,6052 der sîn mit wîsheit kunde pflegen
0,6053 “mîn sêle sich zuolâzen hât
0,6054 sint mîn vriunt gekôset hât
0,6055 sô hân ich in zuo stunten
0,6056 gesuocht unde doch niht vunden
0,6057 ich rief mit inniclîcher gire
0,6058 antwürte en gap er dannoch mir
0,6059 der stete wahtær mich iesâ
0,6060 vunten in den zîten dâ
0,6061 sie wundeten unde sluogen

0,6062 mich sêre in den unvuogen
0,6063 der mûren wahtær under in
0,6064 truogen mînen mandel hin
0,6065 von Jerusalêm ir meide
0,6066 mînen vriunde saget gereite
0,6067 daz ich sî von minnen kranc”
0,6068 daz was Marîen minnensanc
0,6069 iren vriunt den wolte sie haben
0,6070 si hatte sîner liebe entsaben
0,6071 unde der himel süezicheit
0,6072 des hatte sie daz süeze leit
0,6073 zarten jâmer umbe ire vriunt
0,6074 Marîen wole die klage stuont
0,6075 ei edele küniginne
0,6076 wie kanst dû tragen minne
0,6077 zuo eineme vürsten rîche
0,6078 dû minnes wirdicliche
0,6079 er minnet dich hin wider wert
0,6080 iegelich des anderen minne gert
0,6081 er dîner als dû sîner tuost
0,6082 dâ vone dû billiche tragen muost
0,6083 vrouwe die himelkrône
0,6084 die er dir gît zuo lône
0,6085 umbe alsoliche minne
0,6086 dû bist die küniginne
0,6087 der küninc ist dîn zartez kint
0,6088 die zwei gar wâre minne sint
0,6089 iedoch in dirre selben vrist
0,6090 der wünnicliche hêrre Krist
0,6091 mit einer würdiclichen schar
0,6092 quam zuo sîner muoter dar
0,6093 die in hatte hier erzogen
0,6094 hê hatte ire bruste hier gesogen
0,6095 dô hê die lobelichen sach
0,6096 in lûterkeite er zuo ir sprach
0,6097 “dû zartez turteltiubelîn
0,6098 dû ûzerwelte vriuntinne mîn
0,6099 dû lûter schoene sunder wal
0,6100 kein vleckê hât an dir niet mâl
0,6101 dîn zunge honic giuzet
0,6102 dîn munt mit seime vliuzet
0,6103 unde dîn adellicher smac
0,6104 über alle kriutere riechen mac
0,6105 sich der winter ist zergân
0,6106 iz hât sîn reinen ouch gelân
0,6107 die bluomen lobelich ûf gênt
0,6108 die wîngarte alle in blüete stênt
0,6109 die turteltûbe singet nû

0,6110 in unser gemeinede vriuntinne dû
0,6111 stant ûf île wis gereit
0,6112 kum in grôze wirdicheit
0,6113 kum her von dem Libanô
0,6114 gekroenet salt dû sîn iesâ”
0,6115 sehet . daz was Christus widerrede
0,6116 nû wâren kumen dô zuo stete
0,6117 sîne jungeren ouch iesâ
0,6118 des wart die edele Maria
0,6119 verrihtet mit der heilicheit
0,6120 die zuo dem ende ist ûf geleit
0,6121 sô daz allez dâ ergienc
0,6122 Mariam wirdicliche entvienc
0,6123 der hôhe vürste in sîne gewalt
0,6124 die himelkoere manicvalt
0,6125 sungen unde wâren vrô
0,6126 hine vuor die küniginne dô
0,6127 liljen unde roeselîn
0,6128 vîolen zîtelôselîn
0,6129 unde aller hande bluome
0,6130 wâren ir zuo ruome
0,6131 zuo dieneste harte wole bereit
0,6132 si macheten ir ein umbekleit
0,6133 sie hatte dienestes keinen bruch
0,6134 ir diene ouch adellich geruch
0,6135 mirre balsame unde âlôe
0,6136 kardamôme . gamandrê
0,6137 muscâten unde negellîn
0,6138 kubêben galgan . zinemîn
0,6139 unde aller adellich gesmac
0,6140 der von wurzen riechen mac
0,6141 der was aller samet dâ
0,6142 mit der küniginne iesâ
0,6143 dô die himelische schar
0,6144 der küniginne wart gewar
0,6145 von in ein süeze stimme erklanc
0,6146 sie sungen disen wundersanc
0,6147 “wer ist die vrouwe in dirre wât
0,6148 die sô lobelîche ûf gât
0,6149 die ûf gênte wirdet schîn
0,6150 same ein rouches gertelîn
0,6151 von wîrouche unde mirren
0,6152 mit diseme himelhêren
0,6153 war rihtes dû dich wîse maget
0,6154 ein morgenes schîn an dir betaget
0,6155 dû gêst ûf als ein morgenrôt
0,6156 dem di sunne ire schîn entbôt
0,6157 dir edele tohter von Sion

0,6158 gar süeze ist dîner stimme dôn
0,6159 dû bist schoene vüre al wâr
0,6160 dem mânen bist dû gelîche klâr
0,6161 ûzerwelte kûninginne
0,6162 gelîch der klâren sunnen schîne”
0,6163 sus vuoren si wirdiclîche
0,6164 hin in daz himelrîche
0,6165 mit ganzer wurde schône
0,6166 ir wart ouch ûf ein krône
0,6167 die sie êwiclîche zieret
0,6168 man singet unde jûbilieret
0,6169 vore ir iemer âne zil
0,6170 ir dienet ouch juncvrouwen vile
0,6171 der kûninc Dâvît disen rât
0,6172 gar ordenlîche beschriben hât
0,6173 in sîneme psaltersange iesâ
0,6174 sus “– –
0,6175 zuo dîner sîten kûninc rîche
0,6176 ein kûninginne lobelich
0,6177 stuont in gar hôher aht
0,6178 ire kleider wâren ouch gemachet
0,6179 verguldet unde manicvalt
0,6180 was ire umbekleit gestalt
0,6181 tohter hoere neige dich
0,6182 sich den kûninc lobelich
0,6183 nâch dîner schoene hât behaget
0,6184 dîn bilede wûnniclîche maget
0,6185 alle die rîchen ûz der schar
0,6186 betent dich ane iz kumet dar
0,6187 in dîn êre megede vile
0,6188 kûninges tohtere âne zil
0,6189 si werdent in den tÊmpel brâht
0,6190 dâ man vrôuweden hât gedâht”
0,6191 der kûninc ist der hêre Krist
0,6192 von deme hier gesaget ist
0,6193 die kûninginne ist die maget
0,6194 Maria von der ist gesaget
0,6195 die hât sô grôze wirdicheit
0,6196 mit ire kinde âne underscheit
0,6197 ei vrouwe troestærinne
0,6198 durch dînes Kindes minne
0,6199 daz dû mit reinen gelûsten
0,6200 sougetes an dînen brusten
0,6201 tuo uns dîne helfe schîn
0,6202 dû weist wole daz wir niet en sîn
0,6203 leider alsô vollekomen
0,6204 daz wir uns selbe mûgen vrumen
0,6205 des hilf uns edele rôse rôt

0,6206 wente dīner helfe tuont uns nôt
0,6207 unde dīnes zarten kindes
0,6208 iz en sî daz dû entbindes
0,6209 unser nôt mit dīner kraft
0,6210 sô belîben wir unsigehaft
0,6211 des gip daz wir die wirdicheit
0,6212 unde ouch die hôhen klârheit
0,6213 nâch diseme enelende
0,6214 in sīnes vater henden
0,6215 in dīnes vater rîche
0,6216 besitzen wirdicliche
0,6217 mit aller himelischen schar
0,6218 dû hilf uns edele rôse dar
0,6219 hilf uns ouch tugentrîche mêr
0,6220 daz wir an des lîbes ê
0,6221 des ungetriuwen valschen list
0,6222 den man nennet Antichrist
0,6223 unde sīner vore genanten boten
0,6224 von unser sêle sô geroten
0,6225 daz wir mit keinen vunde
0,6226 nû noch alle stunte
0,6227 von in iet werden überrant
0,6228 des sîst dû kûninginne gemanet
0,6229 jâ dirre tiuvelliche man
0,6230 geboren werden sol von Dan
0,6231 Dan der zwelif sūne einer hiez
0,6232 die Jakop in Egipten liez
0,6233 same ir lange hât vernomen
0,6234 von des geslehte sol er kumen
0,6235 von eineme juden wîbelîn
0,6236 daz sal iedoch daz boeseste sîn
0,6237 von deme selben künne
0,6238 untugent wirdet sîn wünne
0,6239 liegen unde unkiuscheit
0,6240 unde aller slahte bôsheit
0,6241 sal daz wîp mit vlîze tuon
0,6242 des vâhet nâch ir ouch der sun
0,6243 den daz wîbelîn gebiret
0,6244 boeser vile er dannoch wirdet
0,6245 in zît der tiuvel in in vert
0,6246 unde im alle tugent wert
0,6247 sehet dâ ziuhet er in vone
0,6248 er gêt ûz von Babilôn
0,6249 sîn meister gît im ouch gewalt
0,6250 über schatz gar manicvalt
0,6251 den sæjet er in alle lant
0,6252 des gênt die hêrren im in hant
0,6253 daz sie nâch sīnen willen lebent

0,6254 wan sie nâch deme schatze strebent
0,6255 alsus werdent sie betrogen
0,6256 alsus wirdet er ûf gezogen
0,6257 daz er gewinnet einen trôn
0,6258 unde nennet sich “von Babilôn
0,6259 ein vürste” sô gewaltic
0,6260 der künige manicvalt
0,6261 zuo Jerusalem er kumet danne
0,6262 unkiusche vol der boese man
0,6263 er machet den tÊmpel wider
0,6264 der von den Romæren nider
0,6265 lange vore gebrochen was
0,6266 unde jihet er sî Messîas
0,6267 der werlte loesære
0,6268 von dem die wissagere
0,6269 die prophêten hânt geseit
0,6270 des volget im die jüdischheit
0,6271 wan sie gelouben alle an in
0,6272 sus ziuhet er die juden hin
0,6273 daz sie wænent alle alsô
0,6274 unde werdent sîner künfte vrô
0,6275 sîn meister lêret in ouch daz
0,6276 daz er guoter liute haz
0,6277 gewinnet alsô krefticlîche
0,6278 daz er mit allen dingen sich
0,6279 alsô dâr zuo stellet
0,6280 daz er die guoten vellet
0,6281 von gotelîchem lebene
0,6282 daz tuot er nû mit gebenne
0,6283 unde nû mit valscher lêre
0,6284 die swachen vallent sêre
0,6285 iedoch die starken vaste stênt
0,6286 ungerne sie von gote gênt
0,6287 sô leget er in zeichen vüre
0,6288 hier sehe iegelîcher vüre die türe
0,6289 daz er iet werde dâ betrogen
0,6290 wan die zeichen sint gelogen
0,6291 got verhenget der gewalt
0,6292 daz die tiuvele manicvalt
0,6293 ûz den bileden mûgent kôsen
0,6294 wer in danne wile gelôsen
0,6295 der wirdet aber dâ betrogen
0,6296 wan daz kôsen ist gelogen
0,6297 hier vore die liute sich bewarn
0,6298 die tiuvele in die greber varn
0,6299 in der tôten wîs si sagent
0,6300 si weinen rienen unde klagent
0,6301 daz si Kristes lebene

0,6302 gevolgeten iesô ebene
0,6303 swer des gestêt der ist betrogen
0,6304 wan daz rienen daz ist gelogen
0,6305 sîn meister lêret in aber danne
0,6306 daz er quâle vinden kan
0,6307 dâ mite er die vesten quele
0,6308 unde si zuo valle alsô erwele
0,6309 swaz liute danne vaste stânt
0,6310 unde die quâle gerne entwâhent
0,6311 die sint der martelære genôz
0,6312 unde entwâhent vrôuwede grôz
0,6313 iemer êwiclîche
0,6314 mit gote in sîneme rîche
0,6315 swaz iute im aber volget nâch
0,6316 den ist in rehten triuwen gâch
0,6317 daz sie zuo der hellen varn
0,6318 unde sich vore sælicheit bewaren
0,6319 doch êr daz dinc alsô ergê
0,6320 sô sal hêrr Enoch kumen êr
0,6321 unde ouch der guote Helias
0,6322 von dem hêrr Malachias
0,6323 in sîner schrift gesaget hât
0,6324 same hier vore geschriben stât
0,6325 sehet die hât unser hêrr
0,6326 behalten alsô verre
0,6327 biz dâr in lieplîcher wer
0,6328 jâ daz reine gotes her
0,6329 den liuten sullent lêre geben
0,6330 daz sie behalten rehtez leben
0,6331 unde kristenlîchen gelouben hân
0,6332 unde daz sie sich mit nihte en lân
0,6333 an des ungetriuwen list
0,6334 der dâ heizet Antichrist
0,6335 wan daz sie haben reinen muot
0,6336 unde ahten niet des boesen guot
0,6337 unde sîner valschen lêre
0,6338 daz sie durch gotes êre
0,6339 ahten sîner zeichene niht
0,6340 unde daz jâmerlich geschihete
0,6341 daz er die guoten slehet tât
0,6342 dâ mit er stellet jâmernôt
0,6343 wen daz sie gar nâch rehte
0,6344 getriuwelîche knehte
0,6345 an gotes dieneste belîben
0,6346 unde sich niet lâzen trîben
0,6347 von der himel wirdicheit
0,6348 die den guoten ist bereit
0,6349 iemer êwiclîche

0,6350 mit gote in sîneme rîche
0,6351 sô der boese wirdet gewar
0,6352 daz sô michel wirdet sîn schar
0,6353 die den hêrren volgen nâch
0,6354 sô wirdet im entriuwen gâch
0,6355 wie er den rât gestelle
0,6356 daz er daz reht gevelle
0,6357 sehet in der geschichte
0,6358 besitzt er ein gerihte
0,6359 unde tuot die heiligen beide iedoch
0,6360 Heliam unde ouch Enoch
0,6361 jâmerlîche ermorden
0,6362 ei kristenlîcher orden
0,6363 wie wirdet danne der genideret
0,6364 unde unreht ûf gevideret
0,6365 daz vliuget danne mit ganzer kraft
0,6366 die liute vallen scharhaft
0,6367 an Antichristes valscheit
0,6368 die heiligen iedoch sint gereit
0,6369 daz sie vaste strîten
0,6370 unde êr die martel lîden
0,6371 danne sie von gote scheiden sich
0,6372 die zît sal werden jâmerlich
0,6373 jâ sô jâmerlîche zît
0,6374 daz lange vore unde aber sît
0,6375 sô grôze nôt wart nie gesehen
0,6376 alsolich jâmer sal geschên
0,6377 die selben zwêne gotes man
0,6378 unbegraben ligent danne
0,6379 an der strâzen umbe daz
0,6380 daz die liute desten baz
0,6381 schrecken an ire tôde haben
0,6382 des belîben si sus unbegraben
0,6383 drî unde einen halben tac
0,6384 grôz jâmer man dâ schouwen mac
0,6385 sô danne der vierde halber komet
0,6386 got die genâde in aber vrumet
0,6387 daz in gît der heilige geist
0,6388 zuo lebenne aber volleist
0,6389 zuo lône wirdet in danne gegeben
0,6390 vrôuwede unde êwiclîchez leben
0,6391 der boese sendet sâr zuohant
0,6392 boten ûz in alle lant
0,6393 die werbent sîne boteschaft
0,6394 den gît der tiuvel dise kraft
0,6395 daz sie die zeichen wirkent ouch
0,6396 die der tiuvelliche gouch
0,6397 vore den liuten trîbet an

0,6398 sehet wer mac über beliben danne
0,6399 der zuo valle niht en kome
0,6400 wente daz ist doch der bezziste vrume
0,6401 daz des ungetriuwen strît
0,6402 niet weren sal gar lange zît
0,6403 sîn hêrschaft weret al vûre wâr
0,6404 ein halbez vollen unde driu jâr
0,6405 die nôt er alsus lange trîbet
0,6406 same hêrr Daniel beschrîbet
0,6407 als er geschriben hât aldâ
0,6408 “– – –
0,6409 – – –”
0,6410 diz mohte iuch alle dunken krump
0,6411 swaz iz gesprochen wære
0,6412 in diutschlicher mære
0,6413 – diutet hier ein jâr
0,6414 – zwei offenbâr
0,6415 – – –
0,6416 dâ sît eines halben an gewis
0,6417 vierdehalp daz aber ist
0,6418 sus lange hêrschet Antichrist
0,6419 der boese tuot behalten sich
0,6420 eineme tôten mennischen gelîch
0,6421 biz der dritte tac erstêt
0,6422 her vûre der wiht danne aber gêt
0,6423 unde seit er sî erstanten
0,6424 ûf von des tôdes banden
0,6425 er sprichet “ich bin gotes sun
0,6426 des vater willen wile ich tuon
0,6427 mîn vater ist der wære got
0,6428 ich muoz ervûllen sîn gebot
0,6429 zuo im sal ich wider varn
0,6430 mîn hêrschaft sal iuch hier bewarn
0,6431 mit mir sulet ir genesen
0,6432 des bin ich hier bî iuch gewesen”
0,6433 des volkes hovelîche schar
0,6434 sol mit ime kumen dar
0,6435 mit vlîze wollent sie besehen
0,6436 waz wonders wolle dâ geschehen
0,6437 daz in die rede werde erkant
0,6438 die tiuvele hebent in zuohant
0,6439 sie vûeren in gein der hoeche wert
0,6440 dirre affenheit der tôr begert
0,6441 nû kumet hêrr Elias
0,6442 same hêrr Malachias
0,6443 in sîner schrifte hât gelesen
0,6444 Enoch sol sîn geverte wesen
0,6445 die vlêhen unde biten got

0,6446 daz er dô zeige sîn gebot
0,6447 an deme tiuvelischen manne
0,6448 daz iz die liute sehen an
0,6449 die liute schouwent alle zuo
0,6450 daz ende nâhet iedoch nû
0,6451 wan unser hêrre Jêsus Krist
0,6452 der hêrre über alle künige ist
0,6453 ein rihtær unde ein heilant
0,6454 sîn hêrschaft machet dâ bekant
0,6455 sîn gewalt unde sîn gebot
0,6456 jâ der trôst der wâre got
0,6457 nider slehet den boesen wiht
0,6458 vore des volkes anegesiht
0,6459 daz in die wârheit werde kunt
0,6460 die engele kument sâr zuo stunt
0,6461 unde slahen die tiuvels abe
0,6462 sâr lâzen sie in ûzer habe
0,6463 unde lâzen in geworden
0,6464 er vellet zuo der erden
0,6465 vile gar er zuobristet
0,6466 daz volc niet langer vristet
0,6467 si schouwent unde sehent dar
0,6468 si nimet alle wunder gar
0,6469 daz er sô zuobrosten lît
0,6470 si klagen ire verloren zît
0,6471 daz[.] sie die alsô hân vertân
0,6472 ûf einen affenlîchen wân
0,6473 die wârheit wider pflanzet danne
0,6474 die doch die zwêne gotes man
0,6475 den liuten hânt gesaget vore
0,6476 des kument sie wider an daz spor
0,6477 der heiliclîchen lêre
0,6478 daz sie widerkêre
0,6479 balde unde endelîche tuon
0,6480 an Krist den wâren gotes sun
0,6481 daz sie riuwen unde leit
0,6482 unde ires herzen bitterkeit
0,6483 unde wâre bihte hân
0,6484 unde balde buoze entwâhen
0,6485 nâch genâden umbe ire missetât
0,6486 solichen heilsamen rât
0,6487 vorehine die hêrren hânt gegeben
0,6488 die liute gâhen unde streben
0,6489 âne geistlîche vâre
0,6490 zuo der hêrren lâre
0,6491 heidene unde Riuzen
0,6492 Kriechen unde Prûzen
0,6493 Ungere . Tatelære

0,6494 Schotten . Franzoisære
0,6495 Walhe . unde ouch Latîne
0,6496 juden . Sarrazîne
0,6497 unde allez volc swaz sprâche iz kan
0,6498 ein herte wirdet allez danne
0,6499 iz werdent alle liute ein schar
0,6500 der sal ein hirte nemen war
0,6501 unser hêrre sprach alsô
0,6502 in deme evangeliô
0,6503 hât er sus gesaget vore
0,6504 “_ _ _”
0,6505 der eine hirte daz ist got
0,6506 si nement alle sîn gebot
0,6507 sich hebet danne ein sûezez leben
0,6508 ein gelten unde ein widergeben
0,6509 waz ieman unrehtes hât
0,6510 iz wirdet ein gotelîcher rât
0,6511 sô wirdet in mennischlîcher ê
0,6512 nieman erhoehet vûrebaz mêr
0,6513 an keinem kûninclîchen ruome
0,6514 joch an der werlte rîchtuome
0,6515 same die heidenische maget
0,6516 Sybilla hât uns vore gesaget
0,6517 unde der heidenische man
0,6518 Virgilius . sich hebet danne
0,6519 daz nieman umbe kouf en vert
0,6520 joch mit mûren sich erwert
0,6521 wan ein ander ist gesant
0,6522 Achilles nû zuo Trôjenlante
0,6523 unde hât verrihtet gar den strît
0,6524 al unvrîde nû gelît
0,6525 sô diz allez nû ergât
0,6526 sô wæne ich daz die werlt hât
0,6527 iedoch ire loufes lezzeste zil
0,6528 ich wæne daz die werlt wile
0,6529 unlange in deme loufe gân
0,6530 wan allez dinc muoz ende hân
0,6531 ich wæne daz ende danne gâhet
0,6532 unde die zît ouch vaste nâhet
0,6533 daz sich der jungestlîche tac
0,6534 danne niet vile lange vristen mac
0,6535 der alsô angestlîche komet
0,6536 der jâmer unde vorhte vrumet
0,6537 allen hêrren sâr zuo stunt
0,6538 daz in angest wirdet kunt
0,6539 same die heidenische maget
0,6540 hât vile rehte vore gesaget
0,6541 unde ouch die lobelîche schar

0,6542 die prophêten alle gar
0,6543 jâ hêrr Sophonias
0,6544 von deme selben tage las
0,6545 wie er angestlîche entstê
0,6546 er sprach “– –
0,6547 diz ist ein tac des zornes
0,6548 ein dôz des herhornes
0,6549 jâmers bitterkeite vol
0,6550 grôz angest dô geschehen sol”
0,6551 Osea hât gesprochen sus
0,6552 “– – –
0,6553 got wile senden einen wint
0,6554 des âderen alle trucken sint
0,6555 der ûz der wüestenunge ûz gêt
0,6556 dâ mite ein viuric vlamme erstêt
0,6557 doch in den selben sorgen
0,6558 wirdet trôst vile gar verborgen”
0,6559 Jôêl sprach in der stunte
0,6560 iedoch von gotes munde
0,6561 “mînen geist ich senden wile
0,6562 mînen knehten vore dem zile
0,6563 êr der tac sô vorhticlich
0,6564 kume grôz unde angestlich
0,6565 zeichene wile ich geben ouch
0,6566 von himele . bluot . viur . unde rouch
0,6567 die sunne in vinsterkeit zuohant
0,6568 in bluot der mâne wirdet verwant
0,6569 in der zît geschihet danne
0,6570 swer mînen namen ruofet an
0,6571 der wirdet geheiliget sâr zuo stat
0,6572 daz volc wile ich zuo Josaphat
0,6573 houfen allez sunder wân
0,6574 wile ich mit in gerihte hân”
0,6575 Ezechiël sprach ouch zuo stunt
0,6576 “– – – – –
0,6577 vile liute erwecket werden
0,6578 die restent in der erden
0,6579 der wirdet iedoch ein teil gegeben
0,6580 in daz êwiclîche leben
0,6581 daz ander teil in êwic leit
0,6582 dâ belîben si âne underscheit”
0,6583 noch ist der prophêten vile
0,6584 der ich nû geswîgen wile
0,6585 die iz allez hânt geschriben
0,6586 waz hier jâmers wirdet getriben
0,6587 ûf den angestlîchen tac
0,6588 dâ nieman sich verbergen mac
0,6589 iedoch sal von êrst geschehen

0,6590 daz man sal jâmerzeichen sehen
0,6591 êr der selbe tac erstê
0,6592 alsolich nôt geschihet êr
0,6593 gein dem wundervreisen
0,6594 den liuten mac wole eisen
0,6595 die danne sîn an lebene
0,6596 unde daz geschouwent ebene
0,6597 ir sint vûnvzehene an der zal
0,6598 iedoch nieman wizzen sal
0,6599 wan iz nieman hât vernomen
0,6600 ob sie nâch einander komen
0,6601 von langer zît von langer vrist
0,6602 diz dinc niemanne kûndic ist
0,6603 daz êrste zeichen ist alsô
0,6604 daz mer über alle berge hôh
0,6605 sal vierzic ellen hôhe gên
0,6606 an sîner stete sal iz stên
0,6607 einer mûren gelîche gestalt
0,6608 daz wunder schouwet junc unde alt
0,6609 daz ander zeichen alsô stât
0,6610 daz mer sich wider nider lât
0,6611 unde senket sich zuo tal
0,6612 daz man iz kûme prüeven sal
0,6613 daz dritte daz ist sôgetân
0,6614 man sihet ûf dem mere gân
0,6615 die merwunder überal
0,6616 die hebent eines ruofes schal
0,6617 der in den himel langen mac
0,6618 daz wirdet ein jâmerlîcher tac
0,6619 daz vierde zeichen sô geschihet
0,6620 daz man alle wazzer sihet
0,6621 in vlammen unde in viure stên
0,6622 diz wunder sal alsô ergên
0,6623 daz vûnfte hoeret überlût
0,6624 alle boume unde allez krût
0,6625 von bluote lâzent einen sweiz
0,6626 daz ist ouch wunder got weiz
0,6627 daz sehste daz ist sô erkant
0,6628 alle mûren sâr zuohant
0,6629 und allez zimber vallen sol
0,6630 dô mac man jâmer schouwen wole
0,6631 an deme sibenden schouwet man
0,6632 daz alle steine heben danne
0,6633 zuo einander einen bôz
0,6634 dô wirdet vile manic herter stôz
0,6635 daz ahtode daz ist sus gevar
0,6636 allez ertgerüste gar
0,6637 mit einander sal erbiben

0,6638 dâ wirdet ouch angest an getriben
0,6639 daz niunde alsô geschehen sal
0,6640 alle berge . unde alle tal
0,6641 sich gelîchen danne der erden
0,6642 sô kleine sal iz werden
0,6643 daz zehende daz ist jâmerlich
0,6644 daz alsus erhebet sich
0,6645 her vûre die liute kriechen
0,6646 âmehtic gelîche den siechen
0,6647 dâ sie wâren in den hollen
0,6648 biz sie die angest muosten dolen
0,6649 si sint vore âmehticheit
0,6650 ouch zuo sprechene ungereit
0,6651 daz einlifte daz ist sôgetân
0,6652 daz man ûf den greberen stân
0,6653 der tôten bein ûfreht gesihet
0,6654 daz selbe wunder dâ geschihet
0,6655 daz zwelifte zeichen sô ergât
0,6656 swaz sterren nû der himel hât
0,6657 zuo dem mâl alle vallent nider
0,6658 noch grôzer dinc geschihet sider
0,6659 nû sal daz drîzehende komen
0,6660 als ich vile rehte hân vernomen
0,6661 alle liute sterben danne
0,6662 iz sîn vrouwen oder man
0,6663 die dâ an lîbe sint gewesen
0,6664 der sal leider niet genesen
0,6665 daz vierzehende wunder vrumet
0,6666 ein sô grôzer vlamme kumet
0,6667 daz himel unde erde berc unde tal
0,6668 allez gar verbrinnen sal
0,6669 daz lezzeste solich wunder bîret
0,6670 himel unde erde niuwe wirdet
0,6671 und der sunnen gelîche klâr
0,6672 daz saget man uns offenbâr
0,6673 unser hêrre erzeiget sich
0,6674 eineme hôhen vûrsten gelîch
0,6675 oben an von ôrient
0,6676 biz nidene an den occident
0,6677 same ein hôch gewaltic got
0,6678 der himel unde erden hât gebot
0,6679 er sitzet eben als ein snuor
0,6680 dâ er ûf zuo himel vuor
0,6681 sînen stuol sîn tribunal
0,6682 in daz wolken sâr zuo mâl
0,6683 brenget man gevuort dort her
0,6684 sîn kriuze nagele unde daz sper
0,6685 unde ouch sîn dûrnîn krône

0,6686 die schouwent dâ gar schône
0,6687 milticheit wirdet dâ verboren
0,6688 die engele blâsent dâ ire horn
0,6689 ire busûnen diezent
0,6690 daz ire stimme erdiezent
0,6691 in die werlt überal
0,6692 sie heben trûriclîchen schal
0,6693 sie ruofen unde schrîent nôt
0,6694 “wole ûf wole ûf got iz gebôt”
0,6695 angest unde jâmertage
0,6696 sich heben unde riuwenklage
0,6697 die tôten stênt ûf unde lebent
0,6698 die grebere alle wider gebent
0,6699 ire korpere ire gebeine
0,6700 sâr werdent aber eine
0,6701 lîp unde sêle zuo der stat
0,6702 sie koment hin zuo Josaphat
0,6703 alle die erstanten sint
0,6704 iz wæren alte liute kint
0,6705 si kument alle samet dar
0,6706 alle iedoch alsô gevar
0,6707 wie hier die liute wæren
0,6708 bî iren drîzic jâren
0,6709 sô sitzet unser hêre dort
0,6710 ieweder sînes mundes orte
0,6711 erschînen sal ein viuric swert
0,6712 daz ist entriuwen vorhte wert
0,6859 daz dritte man ouch lîhte trage
0,6860 daz man iedoch die vîretage
0,6861 gar vlîzicliche halten sol
0,6862 daz hielte ein iegelich mennische wole
0,6863 daz vierde ist ouch sôgetân
0,6864 dû salt vater unde muoter hân
0,6865 alle zît in êren
0,6866 dâ vone sich mac gemêren
0,6867 dîn leben und dîn sælicheit
0,6868 daz vünfte alsô ist ûf geleit
0,6869 daz dû nieman slahes tôt
0,6870 got mit vlîze daz gebôt
0,6871 daz sehste daz man sich bewar
0,6872 vore unkiuschigheite gar
0,6873 dû salt haben reinez leben
0,6874 daz ist zuo reinicheit gegeben
0,6875 daz sibende ist nieman en triuc
0,6876 daz dû iet wirdes valsch geziuc
0,6877 über lîp joch über guot
0,6878 er hât unrht swer daz tuot
0,6879 daz ahtode daz dû niet en queles

0,6880 wie dû dîneme ebenkristene steles
0,6881 weder guot joch kein sîn habe
0,6882 dâ salt dû rehte lâzen abe
0,6883 daz niunde ist ouch alsô geschiht
0,6884 daz dû begeren salt durch niht
0,6885 keines mannes êlich wîp
0,6886 wande sie beide sint ein lîp
0,6887 daz zehende iedoch alsô stêt
0,6888 daz die liute alle an gêt
0,6889 niht beger mit keiner tât
0,6890 swaz dîn ebenkristen hât
0,6891 unde swaz er haben sal durch reht
0,6892 esel maget oder kneht
0,6893 joch alle dinc swaz leie iz sî
0,6894 hier merket lieben alle bî
0,6895 swer die gebot verbrichet
0,6896 unde dâ vone niht en sprichet
0,6897 sîne bihte in andâht
0,6898 die werdent ouch dâ hine brâht
0,6899 si müezent alle kument dar
0,6900 der wirdet ouch ein michel schar
0,6901 an der stat ouch nider liget
0,6902 swer der sinne niet ouch en pfliget
0,6903 die uns zuo guote sint gegeben
0,6904 daz sie verrihten unser leben
0,6905 daz man sie verrihte
0,6906 von êrst an der gesihte
0,6907 swer hengen wile den ougen
0,6908 daz sie sehent untougen
0,6909 swaz der sêle schaden mac
0,6910 unde swer wile hoeren allen tac
0,6911 daz ouch der sêle ist schadelich
0,6912 unde . swer ouch danne wile vlîzen sich
0,6913 daz er zuo allen zîten
0,6914 wile tasten unde lîden
0,6915 swaz der taste sanfte tuot
0,6916 swer ouch wile haben sînen muot
0,6917 unde zuo ruome deme gesmacke
0,6918 mit siedene unde mit gebacke
0,6919 mit âze unde ouch mit tranke
0,6920 swer ouch wile zuo danke
0,6921 dienesthaft deme ruche sîn
0,6922 der læzet rehte werden schîn
0,6923 daz er im gerne ist undertân
0,6924 si wollen in zuo knehte hân
0,6925 an swaz liuten daz geschiht
0,6926 swer sô hoeret tastet sihet
0,6927 riuchet oder smacket

0,6928 die müezent tugende nacket
0,6929 weiz got alle kumen dar
0,6930 der wirdet ouch ein michel schar
0,6931 wâ sît ir nû hêrr Judas
0,6932 hêrr Kain unde hêrr Kaiphas
0,6933 hêrr Phebus . unde hêrr Jupiter
0,6934 hêrr starker . Alexander .
0,6935 vrouwe Venus . unde vrouwe Pallas
0,6936 Achilles . unde Eneas
0,6937 Paris . Hektor . Herkules
0,6938 unde ouch der wîse Ulixes
0,6939 hêrr Simon . unde hêrr Nero
0,6940 Herôdes . unde Pharao
0,6941 ir juden ir Sarrazîne
0,6942 ir getoufeten kauwerzîne
0,6943 ir Prûzen . Tatelære
0,6944 ir roubær . nahtbrantære
0,6945 ir mordær unde ir diebe
0,6946 sehet ir iuch nû iet liebe
0,6947 ir sullet weiz got alle dar
0,6948 alsô ervüllet ir die schar
0,6949 wan ir sît gar der hellen kint
0,6950 hier mite gar begriffen sint
0,6951 swaz liute hât unrehtezen leben
0,6952 den wirdet ein êwic vluoch gegeben
0,6953 ich wæne der vluoch doch alsô sî
0,6954 “– – –”
0,6955 sô sprichet der êwicliche got
0,6956 gar zornliche diz gebot
0,6957 mit zorne sprichet er zuo in
0,6958 “gât ir boesen balde hin
0,6959 in daz viur in daz eit
0,6960 daz iuch ist êwicliche bereit”
0,6961 sâr hebet sich ein schrîen
0,6962 ein zannen maledîen
0,6963 unde ein êwic ungemach
0,6964 si koment in die swebelbach
0,6965 dâ vone die heidenische maget
0,6966 Sybilla hât gar wâr gesaget
0,6967 sô sprichet unser hêrre danne
0,6968 “ir vriunde ir kint ir lieben man
0,6969 die mînen willen hânt getân
0,6970 gêt her ir sullet vröuwede entwâhen
0,6971 in mînes vater rîche
0,6972 daz iuch ist êwicliche
0,6973 ûf geleget unde bereit
0,6974 in alsô ganzer stæticheit
0,6975 sît deme aneginne”

0,6976 in gotelîcher minne
0,6977 hine vert der hêrre vore
0,6978 sâr treten nâch im an daz spor
0,6979 des himelischen trônes
0,6980 die wirdic sint des lônnes
0,6981 die hêrren alle unde alle
0,6982 in rîchelîchem schalle
0,6983 sus hebet sich ein êwic schal
0,6984 vore den hêrren überal
0,6985 ein êwic vrôuwede ein singen
0,6986 ein sîezez harpfen klingen
0,6987 ein psalterisieren
0,6988 ein zartez jûbilieren
0,6989 ein seiten spil ein orgelsanc
0,6990 si sagent alle gote danc
0,6991 si singen aber alle alsô
0,6992 “ – – ”
0,6993 si dankent wirdicliche
0,6994 deme künînge rîche
0,6995 daz er si dâr zuo hât erwelt
0,6996 daz man sie zuo den vrôuweden zelt
0,6997 nû helfet alle biten got
0,6998 durch sîn wirdicliche gebot
0,6999 unde durch die klâren minne
0,7000 die zuo der künîginne
0,7001 der hôchgelobete vürste treget
0,7002 an die er schoenheit hât gelet
0,7003 unde alsô grôze wirdicheit
0,7004 in sîneme rîche âne underscheit
0,7005 daz er sîn wirdiclichez bluot
0,7006 daz ûz sînen wunden wuot
0,7007 daz er vüre unser missetât
0,7008 der künînc hêr gegozzen hât
0,7009 wulle ouch an uns behalten
0,7010 daz wir iet sîn verschalten
0,7011 des êwiclichen lebenes
0,7012 daz er iet hâ vergebenes
0,7013 die quâle alsô durch uns erliten
0,7014 dô er sô jâmerliche versniten
0,7015 an deme vrônen kriuze stuont
0,7016 er wulle uns under sîne vriunde
0,7017 an deme lezzesten tage zelen
0,7018 daz er uns dâ zuo wulle erweln
0,7019 des biten wir den heilant
0,7020 deme alle herzen sint erkant
0,7021 die von lîbe quâmen
0,7022 nû sprechet lieben âmên .